


## **A tha ndonjëherë Jezusi se ishte Perëndi?**

### ***A është Jezusi Perëndi? Shikoni këto deklarata interesante...***

Ndjekësit e hershëm të Jezusit dukeshin se ishin krejt të bindur se Jezusi ishte plotësisht Perëndi në formë njerëzore. Pali tha, "Ai është shembëllesha e Perëndisë së padukshëm...sepse Atit i pëlqeu që në Të të banojë gjithë plotësia [e Perëndisë]." Gjoni tha se Jezusi krijoi botën. Pjetri tha, "kushdo që beson në Të merr faljen e mëkateve nëpërmjet emrit të Tij."



Por çfarë tha Jezusi për veten e vet? A e identifikoi Ai veten si Perëndia? Sipas Biblës...po! Më poshtë janë disa nga thëniet e Tij kur ishte në tokë, në kontekstin e tyre.

### ***Si la të kuptohej se ishte Perëndi:***

Judenjtë, pra, i thanë: "Ti ende nuk je pesëdhjetë vjeç dhe e paske parë Abrahamin?". Jezusi u tha atyre: **"Në të vërtetë, në të vërtetë unë po ju them: para se të kishte lindur Abrahami, unë jam."** Atëherë ata morën gurë, që t'i hidhnin kundër tij; por Jezusi u fsheh dhe doli nga tempulli. (Gjoni 8:57-59)

**"Unë dhe Ati jemi një."** Judenjtë morën përsëri gurë për ta vrarë me gurë. Jezusi u përgjigj atyre: "Ju tregova shumë vepra të mira nga Ati im; për cilën nga këto më vrisni me gurë?". Judenjtë u përgjigjën duke thënë: "Ne nuk të vrasim me gurë për asnjë vepër të mirë, po për blasfemi, dhe sepse ti, duke qenë njeri, e bën veten Perëndi". (Gjoni 10:30-33)

Pastaj Jezusi thirri dhe tha: "Kush beson në mua, nuk beson në mua, por në atë që më ka dërguar. **Dhe kush më sheh mua, sheh atë që më ka dërguar.** Unë kam ardhur si drita për botën, që kushdo që beson në mua të mos mbetet në errësirë. (Gjoni 12:44-46)

**Ju më quani Mësues dhe Zot, dhe mirë thoni, sepse jam.** Në qoftë se unë, Zoti dhe Mësuesi, ju kam larë këmbët, edhe ju duhet t'i lani këmbët njëri-tjetrit. Unë, në fakt, ju kam dhënë shëmbullin që ashtu siç kam bërë unë, bëni edhe ju. (Gjoni 13:12-14)

Jezusi i tha: **"Unë jam udha, e vërteta dhe jeta; askush nuk vjen tek Ati përveçse nëpërmjet meje.** Po të më kishit njohur, do të

kishit njohur edhe Atin tim; qysh tani e njihni dhe e keni parë". Filipi i tha: "Zot, na e trego Atin, dhe na mjafton". Jezusi i tha: "Ka kaq kohë që unë jam me ju dhe ti nuk më ke njohur akoma, o Filip? **Kush më ka parë mua, ka parë Atin;** Si vallë po thua: "Na e trego Atin?". (Gjoni 14:6-9)

### ***Si e përshkroi veten:***

Atëherë Jezusi u tha atyre: "Në të vërtetë, në të vërtetë po ju them se jo Moisiu jua ka dhënë bukët nga qielli, por Ati im ju jep bukën e vërtetë nga qielli. Sepse buka e Perëndisë është ai që zbret nga qielli dhe i jep jetë botës". Atëhere ata i thanë: "Zot, na jep gjithmonë atë bukë". Dhe Jezusi u tha atyre: **"Unë jam buka e jetës; kush vjen tek unë nuk do të ketë më kurrë uri dhe kush beson në mua, nuk do të ketë më kurrë etje.** (Gjoni 6:32-35)

Dhe Jezusi u foli atyre përsëri duke thënë: **"Unë jam drita e botës; kush më ndjek nuk do të ecë në errësirë, por do të ketë dritën e jetës".** Atëherë farisenjtë i thanë: "Ti dëshmon për vetveten; dëshmimi yt nuk është i vërtetë". Jezusi u përgjigj dhe u tha atyre: "Edhe pse dëshmoj për vetveten, dëshmimi im është i vërtetë, sepse unë e di nga kam ardhur e ku po shkoj; ju, përkundrazi, nuk e dini as nga vij dhe as ku po shkoj. (Gjoni 8:12-14)

Prandaj Jezusi u tha atyre përsëri: "Në të vërtetë, në të vërtetë po ju them: unë jam dera e deleve. Të gjithë ata që erdhën para meje janë vjedhës e kusarë; por delet nuk i kanë dëgjuar. **Unë jam dera; nëse dikush hyn nëpërmjet meje, do të shpëtohet; do të hyjë, do të dalë dhe do të gjejë kullotë.** Vjedhësi nuk vjen veçse për të vjedhur, për të vrrarë e për të shkatërruar; por unë kam ardhur që të kenë jetë e ta kenë me bollëk. **Unë jam bariu i mirë; bariu i mirë jep jetën e vet për delet.** (Gjoni 10:7-11)

Marta i tha Jezusit: "Zot, po të ishe këtu, im vëlla nuk do të kishte vdekur, por edhe tani e di se të gjitha ato që ti i kërkon Perëndisë, Perëndia do të t'i japë". Jezusi i tha: "Yt vëlla do të ringjallet". Marta i tha: "E di se do të ringjallet, në ringjallje, ditën e fundit". Jezusi i tha: **"Unë jam ringjallja dhe jeta; ai që beson në mua, edhe sikur të duhej të vdesë do të jetojë.** Dhe ai që jeton e beson në mua, nuk do të vdesë kurrë përjetë. A e beson këtë?". Ajo i tha: "Po, Zot, unë besoj se ti je Krishti, Biri i Perëndisë, që duhet të vinte në botë" (Gjoni 11:21-27)

### ***Çfarë tha se u dërgua të bënte:***

Dhe Jezusi i thirri ata pranë vetes dhe u tha: "Ju e dini se të parët e kombeve i sundojnë ato dhe të mëdhenjtë përdorin pushtet mbi ato, por midis jush kështu nuk do të ndodhë; madje secili prej jush që do të dojë të bëhet i madh, qoftë shërbëtori juaj; dhe kushdo prej jush që do të dojë të jetë i pari, qoftë skllavi juaj. **Sepse edhe Biri i njeriut nuk erdhi që t'i shërbejnë, por për të shërbyer dhe për të dhënë jetën e tij si çmim për shpengimin e shumë vetëve.** (Mateu 20:25-28)

Ai, në fakt, i mësonte dishepujt e vet dhe u thoshte atyre: "**Së shpejti Biri i njeriut do të dorëzohet në duart e njerëzve dhe ata do ta vrasin; dhe, pasi të jetë vrarë, ai do të ringjallet ditën e tretë**". Por ata nuk i kuptonin këto fjalë dhe kishin frikë ta pyesnin. (Marku 9:31-32)

**"Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetë të përjetshme.** Sepse Perëndia nuk e dërgoi Birin e vet në botë që ta dënojë botën, por që bota të shpëtohet prej tij. Ai që beson në të nuk dënohet, por ai që nuk beson tashmë është dënuar, sepse nuk ka besuar në emrin e Birit të vetëmlindur të Perëndisë." (Gjoni 3:16-18)

"Gjithçka që më jep Ati do të vijë tek unë; dhe atë që vjen tek unë, unë nuk do ta nxjerr jashtë kurrë, sepse unë kam zbritur nga qielli jo për të bërë vullnetin tim, por vullnetin e atij që më ka dërguar. Ky është vullneti i Atit që më ka dërguar: që unë të mos humbas asgjë nga të gjitha ato që ai më ka dhënë, por t'i ringjall në ditën e fundit. **Ky, pra, është vullneti i atij që më ka dërguar: që kushdo që sheh Birin dhe beson në të, të ketë jetë të përjetshme, dhe unë do ta ringjall atë në ditën e fundit**". (Gjoni 6:37-40)

*Ende po pyesni veten nëse Jezusi është Perëndi? Për të lexuar më shumë nga fjalët e Jezusit dhe për të kuptuar më shumë pse erdhi Ai, lexoni librin e Biblës të titulluar ["Gjoni"](#) këtu në këtë site.*

© StudentiShqiptar.com

-- eksploro çështje në lidhje me jetën dhe Perëndinë --